



# Cumün d'Ardez

## Radunanza cumünala nr. 12/09 dals 9-06-2009

**Preschaints:** 67 votants e votantas

**S-chüsats:** Gian Linard Nicolay

### Tractandas:

1. Approvaziun dal protocol dals 26-05-2009
2. Tscherna da duos scrutinaduors 592
3. Dumonda da reponderaziun, collavuraziun per controllas pulizialas, credit per la partecipaziun annuala da fr. 20'000.00 593
4. Orientaziuns e varia

### 1. Approvaziun dal protocol dals 26-05-2009

Il protocol dals 26-05-2009 vain approvà davo avair fat ün supplementaint.

## ORGANISAZIUN CUMÜNALA

**16.**

### 2. Tscherna da duos scrutinaduors

592

Il capo fa la proposta da tscherner a sar Marino Fedi ed a sar Carl Campell sco scrutinaduors.

Decisiun: La radunanza cumünala tscherna a sar Marino Fedi ed a sar Carl Campell sco scrutinaduors.

## PULIZIA

**30.**

### 3. Dumonda da reponderaziun, collavuraziun per controllas pulizialas, credit per la partecipaziun annuala da fr. 20'000.00

593

Il capo orientescha cha d'ürant la radunanza cumünala dals 26-05-2009 saja gnü fat ün sbagli formal. Causa quai pretenda ün votant cha la tractanda vegna repetida. El prelegia üna part da la charta dal votant. Il capo orientescha cha la decisiun da la radunanza cumünala saja valabla, eir schi'd es capità il sbagli. El orientescha cha'l sbagli saja capità a regard la proposta da vuschar in scrit o avert, el as s-chüsa per quist sbagli. Implü prelegia'l ün extrat da la pratica dal güdisch administrativ a regard contestaziuns causa sbagls formals. Tenor quella pratica sto gnir fat fingià d'ürant la radunanza protesta cunter ün sbagli formal. Ün votant nu po spettar giò il resultat da la votumaziun e scha quel nu til plascha, pretender mezs legals. La decisiun da la radunanza cumünala dals 26-05-2009 es tras quai valabla. La suprastanza cumünala ha trattà la proposta dal votant e decis da suottametter l'intera fatschenda a la radunanza cumünala per la reponderaziun. Il capo declera il proceder pro üna reponderaziun e fa la proposta da vuschar in scrit. Tenor art. 44 da la constituziun esa d'entrar illa dumonda da reponderaziun be scha quai vain decis da la radunanza cumünala cun duos terzs da las vuschs.

Decisiun: La radunanza cumünala approva la proposta dal capo da vuschar in scrit.

I vain vuschà in scrit. Il capo fa la dumonda scha la radunanza cumünala voul entrar illa reponderaziun a regard las controllas pulizialas.

Decisiun: La radunanza cumünala decida cun 36 a 31 vuschs da na entrar illa dumonda da reponderaziun. La majorità da duos terzs da las vuschs nun es raggiunta e tras quai resta la decisiun da la radunanza cumünala dals 26-06-2009 valabla.

#### **4. Orientaziuns e varia**

##### **4.1 Tuor Vonzun**

Il capo orientescha cha in sonda ils 13-06-2009 da las 16.00 fin 20.00 haja lö l'avertüra da la Tuor Vonzun. Tuot la populaziun es cordialmaing invidada a l'avertüra ed a l'exposiziun da fotografias veglias d'Ardez.

##### **4.2 Radunanzas cumünalas, votumaziuns a l'urna**

Il capo orientescha cha a la suprastanza cumünala haja dat in ögl cha pro las votumaziuns federalas e chantunalas saja la partecipaziun bler plü ota sco pro las votumaziuns cumünalas. El orientescha cha la suprastanza ponderescha da far las votumaziuns per part a l'urna. Pussibel füssa da far üna radunanza d'orientaziun ed in seguit la votumaziun a l'urna. Ün votant animescha a la suprastanza cumünala da ponderar co chi's pudess realisar in ün tal cas la pussibilità per cha'ls votants possan exprimer lur opiniun avant la votumaziun. Il capo accepta quist cussagl chi po eir gnir resguardà pro'ls sclerimaints.

##### **4.3 Uorden da parcar**

Ün votant fa la dumonda schi's possa far quint cul uorden da parcar avant co cha la collavuraziun per las controllas pulizialas va in vigur. Il capo orientescha cha cul uorden da parcar as possa far quint per utuon 2009. Ün votant fa in quist connex la dumonda ingiò chi gnissan lura construidas las plazzas da parcar mancantas. Il capo orientescha cha zonas da parcar sajan previssas tras la planisaziun i'l plan da zonas. Da la vart sura vest dal cumün manca surfatscha per quel scopo.

##### **4.4 Chasa Crusch**

Ün votant orientescha cha la dumonda davo abitaziuns ad Ardez saja gronda. In connex cun quai fa'l la dumonda co chi stà cul proget chasa Crusch. Il capo orientescha chi s'haja fuormà üna cumischiun pel proget chasa Crusch e surdà il pled al schef stabilimaints. Quel orientescha chi hajan lö sezzüdas per definir il proceder cul proget e la finanziaziun. Üna radunanza per quist proget es previssa per utuon 2009.

##### **4.5 Andamaint radunanza cumünala**

Il capo fa la dumonda scha inchün haja amo alch remarchas o protestas a regard l'andamaint da la radunanza cumünala. Quai nun es il cas e la radunanza vain serrada.

27-08.-09

In buna fai

La chanzlista:

Il capo: